

Na osnovu člana 39. i 59. stav (1) tačka d) Zakona o visokom obrazovanju ("Službene novine TK", broj 8/08,11/09 i 12/09), člana 75. stav (1) tačka 2) Statuta Univerziteta u Tuzli, a u vezi sa Uputstvom o formi i sadržaju diplome i dodatka diplomu ("Službeni glasnik BiH", broj 86/09) i člana 5. i 7. stav 2. Pravilnika o sadržaju javnih isprava koje izdaju visokoškolske ustanove u Tuzlanskom kantonu ("Službene novine TK" broj 14/10), Senat Univerziteta na sjednici održanoj 20.04.2011. godine donio je

**PRAVILNIK
O FORMI I GRAFIČKIM STANDARDIMA DIPLOME I DODATKA DIPLOME O
ZAVRŠENIM CIKLUSIMA STUDIJA KOJE IZDAJE
UNIVERZITET U TUZLI**

I – OPĆE ODREDBE

Član 1.

Ovim Pravilnikom bliže se propisuju: dodatni sadržaj diplome, forma diplome i grafički standardi za izradu diplome i dodatka diplomu, veličina (format), vrsta i boja papira, dizajn, način štampe te ostali grafički elementi diplome i dodatka diplomu koje, na osnovu matične evidencije izdaje Univerzitet u Tuzli (u daljem tekstu: Univerzitet).

II – DODATNI SADRŽAJ JAVNIH ISPRAVA

Član 2.

Studentu koji je uspješno izvršio sve obaveze utvrđene studijskim programom prvog, drugog, odnosno trećeg ciklusa studija Univerzitet izdaje diplomu čiji je minimalni sadržaj utvrđen Pravilnikom resornog Ministarstva Tuzlanskog kantona (dalje: Pravilnik Ministarstva).

Član 3.

(Diploma o završenom prvom ciklusu studija)

Diploma o završenom prvom ciklusu studija se štampa na obrascu broj 1., dimenzija 21 cm x 29,7 cm.

Član 4.

(Diploma o završenom drugom ciklusu studija)

Diploma o završenom stepenu drugog ciklusa studija se izdaje na obrascu broj 2., dimenzija 25 cm x 35 cm.

Član 5.

(Diploma o završenom trećem ciklusu studija)

Diploma o završenom stepenu trećeg ciklusa studija se izdaje na obrascu broj 3., dimenzija 42 cm x 29,7 cm.

Član 6.

(Dodatak diplomu)

- (1) Dodatak diplomu je javna isprava koju Univerzitet obavezno izdaje uz diplomu, a čiji je sadržaj i format utvrđen Pravilnikom Ministarstva .
- (2) Dodatak diplome se štampa dvojezično, na odvojenim obrascima i to na engleskom jeziku i na jednom od jezika koji su u službenoj upotrebi u BiH.

III – OBLIK I GRAFIČKO RJEŠENJE DIPLOME I DODATKA DIPLOMI

Član 7.

Na prednjoj strani diplome (za sve cikluse studija) ispod naziva Univerziteta štampa se znak Univerziteta.

Član 8.

Obrazac diplome sastoji se od obrasca diplome i obrasca korice.

Član 9.

- (1) Obrazac korica (za diplome sva tri ciklusa studija) izrađuje se u obliku mape tvrdih korica, u tamnoplavoj boji.
- (2) Na prednjoj strani korica štampaju se naziv i znak Univerziteta, u zlatnoj boji.

Član 10.

Obrasci diploma štampaju se na dokumentnom krem žutom, stotinusedamdeset (170 g/m²) do dvijestotine gramskom (200 g/m²) papiru.

Član 11.

U obrascima diploma o završenim sva tri ciklusa studija tekst, utvrđen Pravilnikom Kantona, štampa se crnom bojom, vrstom Palatino Linotype, a znak Univerziteta i riječ "DIPLOMA" štampaju se crvenom bojom.

Član 12.

- (1) Obrasci dodatka diplome o završenom prvom, drugom, odnosno trećem ciklusu studija štampaju se na dokumentnom krem-žutom stotinugramskom (100 g/m²) papiru.
- (2) Na prednjoj (prvoj) strani dodatka diplome štampa se i znak Univerziteta.

Član 13.

Obrazac dodatka diplome, koji se izdaje uz diplomu o završenom stepenu prvog, drugog, odnosno trećeg ciklusa studija štampa se crnom bojom, vrstom Arijal slova.

IV - PRELAZNE I ZAVRŠNE ODREDBE

Član 14.

Studentima koji su započeli studij po odredbama ranijih propisa, diplome će se izdati na obrascima diplome propisanim Pravilnikom o sadržaju javnih isprava koje izdaje univerzitet("Sl. novine TK," broj17/00 i 8/04).

Član 15.

Ovaj Pravilnik stupa na snagu danom donošenja.

Broj: 03-2635-12.1/11
Tuzla, 20.04.2011. godine

PREDSJEDNIK SENATA

Prof.dr.sc Enver Halilović